

Þingsköp Búnaðarþings

1. gr.

Formaður stjórnar Bændasamtaka Íslands (skammastafað BÍ) setur Búnaðarþing og stýrir vali þingforseta.

2. gr.

Þingforseti stýrir vali annarra embættismanna þingsins, tveggja varaforseta, tveggja skrifara og ritara þingsins. Í forföllum forseta ganga varaforsetar að öllu leyti í hans stað, eftir hans ákvörðun. Ritari færir fundargerð undir stjórn þingforseta. Skrifarar halda gerðarbók undir umsjón þingforseta þar sem skrá skal öll mál fundarins og úrslit þeirra og skrá atkvæði við atkvæðagreiðslur og kosningar. Skrifstofustjóri er forseta til aðstoðar við þinghaldið.

Að lokinni kosningu embættismanna þingsins kjörbréfanefndar gerir framsögumaður kjörbréfanefndar grein fyrir tillögum nefndarinnar um hvort kosning og kjörgengi þingfulltrúa og varafulltrúa þeirra skuli talin gild samkvæmt. Þingforseti ber upp tillögu kjörbréfanefndar munnlega án þess að lesin séu einstök kjörbréf. Þó skal gerð skal grein fyrir þeim kjörbréfum sem lagt er til að verði hafnað.

3. gr.

Í þingbyrjun skal leggja fram þau mál sem borist hafa, fjárhagsáætlun fyrir yfirstandandi ár, drög að fjárhagsáætlun til næstu þriggja ára og ársreikninga fyrir næstliðið reikningsár.

Formaður og framkvæmdastjóri flytja skýrslur sínar að lokinni afgreiðslu kjörbréfa. Að því búnu skulu leyfðar almennar umræður.

4. gr.

Að loknum almennum umræðum er heimilt að kjósa starfsnefndir samkvæmt tillögu stjórnar.

Í hverri nefnd skulu sitja að lágmarki þrjú þingfulltrúar. Enginn þingfulltrúa má eiga sæti í fleiri en einni nefnd. Formaður stjórnar BÍ og forseti þingsins geta verið undanþegnir setu í starfsnefndum. Fulltrúar, sem óska eftir setu í einhverri sérstakri nefnd, komi þeim óskum á framfæri við stjórn a.m.k. tveimur vikum fyrir búnaðarþing.

Á fyrsta fundi hverrar nefndar skal kosinn formaður og varaformaður sem jafnframt er ritari. Nefnd lætur uppi álit sitt og dreifir því meðal þingfulltrúa áður en málið er tekið til umræðu á þinginu. Nefndarálit skal undirritað af nefndarmönnum og tilgreint hver sé framsögumaður.

Nefnd getur lagt til, með rökstuðningi, að mál, sem vísað er til hennar, verði tekin út af dagskrá þingsins og vísað til stjórnar BÍ. Um slíka tillögu fer atkvæðagreiðsla fram umræðulaust.

Stjórn BÍ getur falið aðstoðarmönnum að aðstoða einstakar nefndir við störf þeirra.

5. gr.

Í upphafi hvers þingfundar skal dreifa dagskrá fundarins. Forseti getur tekið mál út af dagskrá og tekið ný mál á dagskrá er sérstaklega stendur á. Þingfulltrúi getur, meðan á umræðum stendur, krafist þess að mál verði tekið út af dagskrá. Um slíka tillögu fer atkvæðagreiðsla fram umræðulaust. Málum sem lögð eru fram á þinginu skal vísað til nefndar umræðulaust.

Þingforseti hefur rétt til að vísa málum aftur til nefndar til frekari úrvinnslu.

Komi fram fyrirspurnir til stjórnar eða starfsmanna BÍ má forseti ákveða eina umræðu um þær. Sá, sem fyrirspurninni er beint til, hefur sama rétt til ræðutíma og framsögumenn nefnda.

Heimilt er að hafa Búnaðarþing lokað um einstök mál. Slíkt skal á valdi þingsins hverju sinni.

6. gr.

Forseti stýrir umræðum á þinginu og kosningum þeim er þar fara fram. Skal hann færa mælendaskrá og gefa þingfulltrúum og þeim öðrum, er málfrelsi hafa, færi á að taka til máls í þeirri röð sem þeir beiðast þess. Þó má hann víkja frá þeirri reglu er sérstaklega stendur á. Nú vill forseti taka þátt í umræðum frekar en forsetastaða hans krefur, vísar hann þá úr forsetastól, en varaforseti tekur við fundarstjórn á meðan. Forseta er heimilt að takmarka ræðutíma þingfulltrúa.

7. gr.

Þingfulltrúar hafa rétt til þess að tjá sig um öll mál sem eru til meðferðar á þinginu. Stjórnarmenn BÍ hafa málfrelsi og tillögurétt eins og hinir kjörnu þingfulltrúar. Starfsmönnum BÍ, endurskoðanda og skoðunarmanni er heimilt að tala í þeim málum sem snerta starfssvið þeirra sérstaklega. Auk þess er þeim heimilt að gefa stuttar upplýsingar, ef þingfulltrúar óska þess, eða gera stuttar athugasemdir til þess að bera af sér sakir. Forseti getur lagt til að umræðu sé hætt. Sama rétt hafa þingfulltrúar. Um slíka tillögu fer atkvæðagreiðsla fram umræðulaust.

8. gr.

Kjörnir þingfulltrúar hafa einir atkvæðisrétt á þinginu. Afl atkvæða ræður úrslitum mála á fundum, nema samþykktir BÍ kveði á um annað.

Enga ályktun má afgreiða nema minnst 2/3 þingfulltrúa séu á fundi.

9. gr.

Allir félagsmenn í BÍ eru undantekningalaust í kjöri til trúnaðarstarfa á vegum samtakanna. Sé skipuð uppstillinganefnd samkvæmt 6. grein samþykktar BÍ skal hún skila tillögu um að lágmarki jafn marga einstaklinga og kjósa skal hverju sinni. Takist það ekki tekur þingið tillögu nefndarinnar ekki til meðferðar og skulu þá stjórnarmenn kosnir úr hópi búnaðarþingsfulltrúa.

Búnaðarþing skal á ári hverju kjósa einn löggiltan endurskoðanda BÍ og annan til vara. Þá skal kjósa einn skoðunarmann reikninga og annan til vara.

Búnaðarþing skal á ári hverju kjósa þrjú manna kjörbréfanefnd sem starfar milli þinga. Jafnframt skal kjósa uppstillingarnefnd, þrjú aðal- og þrjú varamenn til tveggja ára í senn.

10. gr.

Forseti stýrir atkvæðagreiðslu og kveður menn sér til aðstoðar eftir þörfum til að telja saman atkvæði.

Atkvæðagreiðsla fer að jafnaði fram með handaruppréttingu. Heimilt er að viðhafa leynilega atkvæðagreiðslu um einstök mál ef sérstakar aðstæður kalla á slíkt. Ennfremur er forseta heimilt að endurtaka atkvæðagreiðslu með nafnakalli ef hann telur þess þörf. Kjör stjórnar skal fara fram með leynilegri atkvæðagreiðslu.

11. gr.

Skýlt er þingfulltrúum að sækja alla fundi þingsins nema um lögmæt forföll sé að ræða. Varafulltrúar taka sæti aðalfulltrúa í forföllum þeirra, með samþykki forseta.

12. gr.

Skýlt er þingfulltrúum og öðrum, er rétt hafa til að sitja þingið, að lúta valdi forseta í öllu er lýtur að því að gætt sé góðrar reglu.

Víki þingfulltrúi eða aðrir, sem málfrelsi hafa, með öllu frá umræðuefninu í umræðum mála, skal forseti víta það. Ef hlutaðeigandi sinnir ekki slíkri ábendingu, þó að hún sé ítrekuð, má forseti svipta hann málfrelsi á þeim fundi í því máli sem um er rætt.

13. grein

Fundargerðir skulu frágengnar svo fljótt sem verða má. Þær skulu bornar upp og samþykktar og síðan undirritaðar af forseta. Forseta er heimilt að leita samþykkis á því að fundargerð sé send þingfulltrúum til staðfestingar.

14. gr.

Á aðal- og aukarþingum gilda almenn fundarsköp að því leiti sem reglur þessar taka ekki til.

Samþykkt á Aukabúnaðarþingi, 10. júní 2021.